

GALLIAE NARBONENSIS ORA MARITIMA.

HVIUS Tractus loca celebriora describit Gulielmus Paradinus his verbis; Arelatē Sextanorum Coloniam fuisse tradunt scriptores. Ea Ciuitas ad Rhodanum vndique septa est paludibus: in quibus hodie praeferos aluntur boues. Olim nobile Emporium fuisse, Strabo auctor est his verbis; Narbo (inquit) amplissimum eius Regionis supra exitum Ataxis fluminis, Narbonensemque lacum, iacet: Rhodano autem Oppidum, Emporiumque non paruum Arelate. Arelatae vicinae sunt aquae calidae, apud quas Sextius, ut idem Strabo ait, oppidum sui nominis aedificauit, vocauitque hoc Aquas Sextias. Condendi Oppidi consilium fuit, ut illic Romanum collocaret praesidium. Illic caesos fuisse Cymbros a Mario, scribit D. Hieronymus. Arausio (hodie Orange) Cabilonensium Imperio olim insignis; in qua Theatri ingentis ruinas, & stupendi operis murum quadrato affabre lapide vidimus, & cui haud scio an Gallia vniuersa similem habeat. Est & ad Portam, qua Lugdunum spectat, Arcus triumphalis, cum insculpta Equestri pugna, quam diu magna voluptate spectauimus. Huc & Nemausum pertinet, Amphitheatro antiqui operis visendum (Arenas vocant) mirum illic ostendi subterraneum meatum, qui per transfuersum Rhodanum sub ipso alueo ductus, in procul distitam perueniat ciuitatem. Est & Basilica Plotinae, quam Hadrianus Imp. exaedificauit, Auctore Spartiano. &c. Haec ex Paradino. Sed accuratissime descripsit hanc Urbem, iconibusque eius antiquitates ob oculos ponens Ioannes Poldo Albenas; idemque locorum vicinorum situm, & antiquas appellationes diligentissime perquirat. De hoc vide quoque apud Strabonem lib. 4. Vide etiam Guntherum Ligurinum Poetam. Huius Tabulae archetypum sua manu descriptum nobis communicauit D. Carolus Clusius amicus noster.

BVRGVNDIAE COMITATVS.

BVRGVNDIA duplex, altera Inferior, quae & Regia vocatur; haec Ducatus nomine gaudet, olim Heduarum Regio: Altera Superior, quae Imperatoria vocatur (Marliano teste) & Comitatus nomine censetur; hanc olim habuerant Sequani: Eam haec Tabula continet. Cuius Regionis fertilitatem haud facile quis dixerit, ita enim in omni frugum genere foecunda est, ut semper vilissimo precio frumenta, vina, olea, ibidem veniant: carnibus & omnibus denique ad victum necessariis superabundat; ita, ut altera Italia, situ, aëris amoenitate, & salubritate, videatur. Hominum proceritas ac corporum pulchritudo omnibus nota est: nec minus apud omnes eorum virtus clara est. Cuius Metropolis est Bisontium.
Sed singulas eius Vrbes descriptas, habes apud Cognatum Nozerenum. Vide & Paradinum: nec non Robertum Cœnalem.

